

世安居道德中洪爐迸濺鍊金英一點靈珠透室明擺動乾坤
知道力逃移生死見功程逍遙四海留踪跡歸去三清立姓名
直上青雲雲路穩紫鸞朱鳳自來迎時人若要學長生先是樞
機晝夜行恍惚中間專志氣虛無裏面固元精龍交虎變三周
畢兔走烏飛九轉成鍊出一爐神聖藥青雲歸去路分明題畢
初見若無字既而墨蹟燦然透出壁後侯大驚再拜因問劍法
曰有道劍有法劍道劍則出入無形法劍則以術治之者此俗
眼所共見第能除妖去祟耳侯曰今以道劍戮奸人於稠衆中
得不駭俗乎曰人以神爲母氣爲子神存則氣聚神去則氣散
但戮其神則人將自沒或有假手於人皆此類也侯歎曰此真
道藏輯要

聖蹟紀要

共

壁集五

仙之言也願聞姓氏曰吾呂巖也言訖因擲劍於空中化爲青
龍跨之而去

遊金鵝寺

呂帝抵四明金鵝寺顧方丈蕭然頃有童子出呂問此何寥寥
曰莫道寥寥虛空也不著遂佳其言題詩於壁云方丈有門出
不鑰見箇山童露雙腳問伊方丈何寥寥道是虛空也不著聞
此語何欣欣主翁豈是尋常人我來謁見不得見渴全唐心耿
耿生埃塵歸去也波浩渺路入蓬萊山杳杳相思一上石樓時
雪晴海濶千峯曉

遊廬山寺